

P A R E N S



PARENS, vulgari Italorum idiomate Parenzo, oppidum Histriae siue Dalmatiae ad mare Adriaticum, iucundo ac peramœno situ, de cuius appellatione Bredebachius in Hierosolymitana sua peregrinatione ita scribit: Paris Troianus, cum Helenam Graeciae reginam, Menandri Regis coniugem, raptum pergeret, quæ res Troiani excidij principium fuit, omnem suam classem in hac ciuitate instruxit. Et cū ipsa Helena rapta illuc ex Græcia reuersus, votoque potius esset, à nomine suo ciuitati nomen imposuit, ipsamque Paridinum appellauit. C. miliaribus à Venetis, quorum paret imperio, distat, dignam Episcopo sedem præbet: Basilicam habet præstantibus diuorum reliquijs venerabilem, in qua S. Dimetrii Iuliani, Bertæ, & Acolitæ ossa magna religione asseruantur. Ex hac Parentina vrbe terrestri itinere Hierosolymam non incommodè perueniri posset, sed publicæ fidei literæ, non facilè impetrantur, & eo quod Histriae partes diuersos agnoscant retores: partem siquidem eius Imperator Augustus, partem Veneti, partem Turcarum Cæsar sibi vendicat. Itaque peregrinis tanquam exploratoribus suspectis non facilè hac transitus patet. Eadem etiam de causa steriles sunt Geographorum & Topographorum de hac Regione historiae, cum eam liberius perlustrandi nemini concedatur facultas.

M O D O N A



MODONA Ptolomæo, Methone, vrbs est littoralis Poloponnesi, tam situ loci, quàm mortalium industria valde munita, opibus incolarum frequentia, Archiepiscopatu & Clero eo tempore, quo Reipub. Venetæ parebat, clarissima, quo peregrini Hierosolymitani quotannis solebant diuertere. Verùm tam nobilis & præstans vrbs Venetorum imperio Anno Christi M. D. eripitur à Baiazeto, eius appellationis secundo, Rege Turcarum nono, & Imperatore secundo, qui Venetis, ob receptum in defensionem atque tutelam Ioannem Cemouichium Comitem, offensus, bellum ipsis terra marique indixit, atque incredibili exercitu Dalmatiam vniuersam depopulationibus vastans, tanta immanitate in Christianos defecit, vt Venetorum etiam Reipublicæ exercituique formidini esset, qui magna celeritate militem vndeque collectum triremibus imponentes, Modonam vsque perueniunt, quibus cum tantum inesse virium cerneret Turca, vt sustinere eorum impetum se posse diffideret, in Sapientiae portum sese recepit, & discedentibus deinde Venetis, oppidum Lapantum, veteribus Naupactum, expugnauit ac vicit. Acciderunt hæc anno salutis M. CCCC. XCVIII. Ceterum cum conatibus suis hoc tractu Modonam urbem nunquam non obsistere, multumque Venetis semper opis adferre Baiazetus cognosceret, quas potuit cunque vires in eius oppugnationem collegit, eamque subito graui obsidione tribus in locis arctissime cinxit, machinis æreis quingentis, quarum duæ & viginti muris euertendis noctu dieque destinebantur, urbem verberauit, mortarijs in eam ignem euomuit, mœnia & Propugnacula vrbs solo aequans, nouum quotidie militem adduxit sub mœnia. Ita quidem vt oppidani continuis in repugnando laboribus fracti, auxiliares etiam copias frustra expectantes, vrbs conseruandæ spem amitterent. Interea verò quatuor Venetorum triremes, auxiliarijs munitæ militibus commætu, munitione, ceterisque rebus, implacabili marti necessarijs, instructæ, magno obsidione constructorum gaudio, at infausto tandem omnium exitio aduenere. Dum etenim ij, qui in propugnaculorum & mœniorum ruderibus atque ruinis, ad hostium vim depellendam erant dispositi, Venetorum ad motam littori classem conspicerent, aduentantium apparatus visuri, stationes suas inconsultè ac temere deferentes accurrunt. Baiazetæ interim Ianicæ ob latam sibi temeritatis occasionem captantes, facili negotio urbem inuadunt & expugnant, nouosque milites in suam potestatem redactos membratim ante dissecant, quam in urbem ipsi ex nauibus fuissent egressi. Eaque ratione, immanissimus Turcarum tyrannus, anno ab orbe redempto M. D. decimo Augusti die, quæ D. Laurentio sacra fuit, Modona positur.

S E B E N I C O



SEBENICO Antiquis Sicum, vulgò Sebenicho, vrbs maritima in Hadriatici maris littore iuxta Dalmatiae fines, Venetorum imperio paret. In quam, asserente Plinio lib. 3. Naturalis historiae, cap. XXI. Diuus Claudius, Veteranos transmisit.